

**Kultureqarnermut, Ilinniartitaanermut, Iisimatusarnermut Ilageeqarnermullu  
Ataatsimiititaliap**

**2020 nallertinnagu ullukinnerup ulloq 21. decembarip pisortatigoortumik  
nalliussineqartalernissaanik atulersitsinissaq pillugu Inatsisartuni aalajangiiffigisassatut  
siunnersuut.**

Inatsisartunut ilaasortaq Peter Olsen, Inuit Ataqtigiit

**Pillugu**

**ISUMALIUTISSIISSUTAA**

**Siunnersuutip aappassaanneerqarnerani tunniunneqartoq**

Kultureqarnermut, Ilinniartitaanermut, Iisimatusarnermut Ilageeqarnermullu  
Ataatsimiititaliaq suliaqarnermi kingullermi makkuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq

Inatsisartunut ilaasortaq Mimi Karlsen, Inuit Ataqtigiit, siulittaasup tullia

Inatsisartunut ilaasortaq Laura Táunâjik, Siumut

Inatsisartunut ilaasortaq Nivi Olsen, Demokratit

Inatsisartunut ilaasortaq Sofia Geisler, Inuit Ataqtigiit

UKA2018-imi ulloq 29. oktober 2018 siunnersuutip siullermeerlugu oqallisigineqarnerata  
kingorna siunnersuut Ataatsimiititaliamit misissorneqarpoq.

**1. Siunnersuutip imarisaa siunertaalu**

Ullukinnerup ulloq 21. decembarip pisortatigoortumik nalliussineqartalernissaanik  
atulersitsinissamik Naalakkersuisut peqquneqassasut ullut nalliussineqartartut ikippallaarnerat  
aammalu ullukinnerup nalliussineqartarnera siulitta oqaluttuaanni ilaammat  
siunnersuutigineqarpoq. Ilanngullugu siunnersuutigineqarpoq, ullorsiuutinut  
ilanngunneqartalissasoq ullullu nalliussineqarneranut atatillugu immikkut kultureqarnermi  
sammisaqartitsisarnermi aningaasaliivigineqartassasoq.

**2. Siunnersuuteqartumik ataatsimeeqatiginninneq**

Ataatsimiititaliap siunnersuummik suliaqarneranut atatillugu, siunnersuutip

sunniutigisinnaasai kissaatigineqartut pillugit oqaloqatigiinnermi siunnersuuteqartooq peqataavoq. Ataatsimiititaliap suliaanut oqaloqatigiissutigineqartut ilanngunneqarput.

### 3. Ataatsimiititaliap siunnersuummik suliarinninnera

Siunnersuut ataatsimiititaliap misissorpaa tassungalu atatillugu ullukinnerup ullorsiorneqartarnera ullullu erfalasulersorfiusut pillugit imatut oqaaseqassaaq.

*Ullorsiorneq* ulluuvoq, pisimasoq aalajangersimasoq nalliuttorsiorniarlugu imaluunniit sammisaq aalajangersimasoq malunnartinniarlugu nalliussineqartartut. Ullorsiorfiit pilerfimmikkut siunertamikkullu siammarsimasorujussuupput – inuttut ullorsiorfiit politikikkut, aningaasaqarnikkut imaluunniit upperisarsiornikkut ullorsiorartoqartarluni.

*Ullut erfalasulerfiusussat* pisortatigoortumik ulloritinneqartartut pisortallu illuutaanni erfalasulerfiusussat. Ullut erfalasulerfiusussat Namminersornerullutik Oqartussat nalunaarutaat nr. 26, 11. november 2008-imeersoq malippaat. Inuinnaat namminneq aamma erfalasuleqataasarput. Ullut erfalasulerfiusussat nalunaarut malillugu ullorsiorfinnit nalinginnaasunit ileqqusutut pingaartinneqarnerusarput. Ullumi erfalasoqarfiusumi aalajangersimasunik sammisassaqaqtitsinernik ingerlatsisoqassasoq nalunaarummi allassimasoqanngilaq.

Ukiumi ullorsiornerit marluk *seqernup uterialerfianut* atatinneqarput, tassa ullortuneq ulloq 21. Juni aamma ullukinneq ulloq 21. december. Ullorsiuutini nalunaaqutsersimasarput “ullortuneq” aamma “ullukinneq”.

“Ullukinneq” pisortatigoortumik nalliussineqartalernissaanik atulersitsinissamut Naalakkersuisut peqquneqassasut siunnersuutip siunertaani piumasaqaataaneranut ataatsimiititaliaq ima oqaaseqassaaq:

- Qitiusumit kulturikkut aaqqissuussinernut ullup nalliussineranut siunnersuuteqartooq aningaasanik illikartitseqquvoq,
- Pisortatigoortumik ullorsiornissamut naalakkersuinikkut Inatsisartuni aalajangiinernik assersuutaasinnaasunik, inuiattut ullorsiorarnerup saniatigut peqanngilaq,
- Naalakkersuisut akissuteqaammi tikkuarpaat ullukinneq ulloq 21. december pisortatigoortumik erfalasulerfiusussatut nalunaarsugaareersoq, tassuuna pisortatigoortumik malunnartinneqartarluni,
- Naalakkersuisut akissuteqaammi tikkuarpaat, kulturimut attuumassuteqartunik
- aaqqissuussisartutulli Namminersorlutik Oqartussat aningaasaateqarfiinut Tips – aamma lotto pulje B pulje C-mut kiisalu Kulturimut aningaasaateqarfimmuut qinnuteqartoqarsinnaasoq AIS2019-imi annertussuseqarput 10 mio. kroninik.<sup>1</sup>

<sup>1</sup> (Konto pingarneq 40.94.21-mut, Danske Spil A/S-imit Kalaallit Nunaata tipsimit lottonillu

**4. Siunnersuutip aningaasatigut kingunerisassai:**

Aalajangiiffigisassatut siunnersuummi oqaatigineqarpoq aallaqqaammut kulturikkut aaqqissuussinernut 150.000 koruunit illikartinneqassasut. Aningaasaliissutinik atugassanngortitsinermut atatillugu allaffissornikkut aningaasartuuteqarnissaq siumut takorloorneqassaaq. Siunnersuuteqartup killiliussatut siunnersuutaa tunngavigalugu qitiusumik aaqqissuussinertit killeqarnissaat ilimanarpoq. Tamatuma saniatigut annertunerusumik ataatsimiititaliaq oqaaseqaatissaqanngilaq.

**5. Ataatsimiititaliap inassuteqaataa**

”Ullukinneq” immikkut ittumik ullutut siunertaatut nalunaarutigineqarnissaa ataatsimiititaliap tapersersorpaa – taamaasilluni *pisortatigoortumik nalliussineqartassasoq*. Taamaattoq ataatsimiititaliap paasivaa, ulloq 21. Decembarip nalliussineqarsinnaananut atatillugu ullumikkut amerlasuunik qinnuteqarfissanik periarfissaqarluartoq pisortanit aningaasaliissutaasinnaasunik, assersuutigalugu tipsimit lottonillu aningaasaliissutit. Taamaasillugu ataatsimiititaliap ataatigut naqissusissavaa, ullukinnersiornermut immikkut aningaasaliissutissanik immikkoortitsinissaq kissaatigineqanngitsoq, ataatsimiititalialli, ulloq pisortatigut nalliussineqartarnissaata suaarutigineqarnissaa tapersersorpaa.

Taamatut oqaaseqarluni isumaliutissiisummilu allassimasutut paasinnillutik matumuuna **siunnersuut** ataatsimiititaliap isumaqatigiittup **akuerisassanngortippaa**.

---

Doris J. Jensen  
Siulittaasoq

---

Mimi Karlsen  
Siulittaasup tullia

---

Laura Táunâjik

---

Nivi Olsen

---

Sofia Geisler